

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKAH SAHIH/BAHASA MALAYSIA**

<http://www.parlimen.gov.my>

**HARI SELASA, 14 MAC 2023, PUKUL 10.00 PAGI**

**Bil. 9**

---

**WAKTU PERTANYAAN-PERTANYAAN MENTERI**

1. PR-1521-MQT2089  
**Dr. Mohammed Taufiq bin Johari [ Sungai Petani ]** minta **PERDANA MENTERI** menyatakan bagaimanakah sasaran pengurangan defisit daripada 5.6% tahun 2022 kepada 3.2% tahun 2025 seperti yang telah dibentangkan, dapat dicapai tanpa menjejaskan kebajikan rakyat dan pembangunan negara MADANI.
2. PR-1521-MQT2086  
**Datuk Haji Ahmad Amzad bin Mohamed @ Hashim [ Kuala Terengganu ]** minta **PERDANA MENTERI** menyatakan kekuatan fiskal negara ekoran matawang Ringgit yang semakin melemah dan apakah solusi Kerajaan bagi mengimbangi situasi ini.
3. PR-1521-MQT2092  
**Datuk Matbali bin Musah [ Sipitang ]** minta **PERDANA MENTERI** menyatakan usaha penambahbaikan tata kelola Kerajaan dari segi perolehan, pengagihan projek, peruntukan dan seumpamanya yang mampu memberi impak secara menyeluruh agar selari dengan corak dasar MADANI dalam memerangi segala penyalahgunaan kuasa dan ketirisan.

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKAH SAHIH/BAHASA MALAYSIA**

<http://www.parlimen.gov.my>

**HARI SELASA, 14 MAC 2023, PUKUL 10.00 PAGI**

**Bil. 19**

---

**WAKTU PERTANYAAN-PERTANYAAN MENTERI**

---

**PERTANYAAN-PERTANYAAN BAGI JAWAB LISAN**

1. PR-1521-L18448  
**Tuan Wong Kah Woh [ Taiping ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan jumlah peruntukan yang telah diberikan kepada Zoo Negara dan Zoo Taiping sejak tahun 2018 sehingga kini. Nyatakan jumlah pelancong yang direkodkan untuk tempoh berkenaan.
2. PR-1521-L18893  
**Tuan Ahmad Fadhli bin Shaari [ Pasir Mas ]** minta **MENTERI LUAR NEGERI** menyatakan langkah yang telah diambil oleh Wisma Putra dalam membantah perbuatan membakar kitab suci Al-Quran oleh salah seorang ahli politik sayap kanan Sweden di Stockholm baru-baru ini.
3. PR-1521-L18647  
**Datuk Seri Panglima Haji Mohd Shafie bin Haji Apdal [ Semporna ]** minta **MENTERI KESIHATAN** menyatakan adakah Kementerian akan memperkasakan kempen mengamalkan diet sihat di kalangan rakyat serta menyediakan insentif khusus kepada mereka yang berjaya mendapatkan berat badan yang ideal.

4. PR-1521-L18076  
**Dato' Sri Ikmal Hisham bin Abdul Aziz [ Tanah Merah ]** minta **MENTERI DALAM NEGERI** menyatakan apakah usaha yang dilakukan oleh Kerajaan dalam usaha mengekang lebih ramai rakyat negara ini menjadi mangsa sindiket pekerjaan.
5. PR-1521-L18349  
**Puan Vivian Wong Shir Yee [ Sandakan ]** minta **MENTERI PEMBANGUNAN KERAJAAN TEMPATAN** menyatakan sama ada terdapat peruntukan yang diperuntukkan di bawah RMK-12 bagi membina tapak pelupusan sisa pepejal menggunakan teknologi sanitari (*Sanitary Landfill*) yang sesuai bagi menggantikan tapak pelupusan sampah sedia ada di Sandakan, yang terkenal dengan bahaya atau ancaman alam sekitar kepada masyarakat setempat.
6. PR-1521-L18768  
**Dato' Hajah Mumtaz binti Md Nawi [ Tumpat ]** minta **MENTERI PENGANGKUTAN** menyatakan bilakah Pantai Timur terutamanya Kelantan akan mendapat landasan kereta api berkembar sebagaimana yang telah sekian lama dinikmati oleh rakyat di Utara dan Selatan.
7. PR-1521-L18383  
**Puan Syerleena binti Abdul Rashid [ Bukit Bendera ]** minta **MENTERI KEMAJUAN DESA DAN WILAYAH** menyatakan setakat ini, berapa jumlah peserta GIATMARA yang telah berjaya menghabiskan kursus-kursus yang telah disediakan dan berapa jumlah peserta yang telah berjaya menjadi usahawan dan pekerja mahir terutamanya belia yang keciciran pelajaran. Nyatakan pecahan mengikut tahun bermula 2020 sehingga kini.
8. PR-1521-L18952  
**Datuk Haji Ahmad Marzuk bin Shaary [ Pengkalan Chepa ]** minta **MENTERI PENGANGKUTAN** menyatakan perancangan terkini Kementerian memanfaatkan Lapangan Terbang Sultan Ismail Petra sebagai hub penerbangan serantau dan menjadi pintu masuk utama pasaran Indochina.

9. PR-1521-L18133

**Tuan Sim Tze Tzin [ Bayan Baru ]** minta **MENTERI SUMBER MANUSIA** menyatakan apakah cabaran Talentcorp bagi menarik rakyat Malaysia kembali bekerja di tanah air memandangkan masalah antara agensi seperti masalah mendapatkan visa untuk pasangan, masalah karenah birokrasi dan sebagainya. Apakah strategi Kementerian untuk mengurangkan aliran rakyat Malaysia keluar bekerja di negara asing seperti Singapura, Dubai, China, USA memandangkan tawaran gaji yang lebih baik dan nilai Ringgit yang semakin susut.

10. PR-1521-L19371

**Dato' Dr. Alias bin Razak [ Kuala Nerus ]** minta **MENTERI KESIHATAN** menyatakan :

- (a) statistik doktor yang sedang melanjutkan pengajian untuk menjadi doktor pakar dalam kesemua bidang kepakaran; dan
- (b) inisiatif Kementerian untuk menggalakkan lebih ramai doktor melanjutkan pengajian di peringkat pakar khususnya bidang-bidang kepakaran yang kritikal.

11. PR-1521-L19303

**Tuan Syahredzan bin Johan [ Bangi ]** minta **MENTERI PEMBANGUNAN KERAJAAN TEMPATAN** menyatakan statistik bilangan pangsapuri kos rendah yang mana badan pengurusan bersama/perbadanan pengurusan tidak aktif ataupun gagal ditubuhkan mengikut negeri serta langkah jangka pendek dan panjang yang diambil Kementerian untuk membantu pengurusan dan penyelenggaraan bangunan serta kemudahan bersama pangsapuri seperti ini.

12. PR-1521-L19253

**Datuk Ali anak Biju [ Saratok ]** minta **MENTERI KEMAJUAN DESA DAN WILAYAH** menyatakan status terkini Projek Jalan Bajau - Kupang bernilai RM90 juta yang telah lama dinantikan oleh rakyat di kawasan Saratok dan bilakah proses tender dan pembinaan akan bermula .

13. PR-1521-L18100

**Dato' Sri Dr. Wee Jeck Seng [ Tanjung Piai ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan bilakah sistem pembentungan dan sanitari perkampungan atas air, Kukup Laut dan Ayer Masin yang telah sampai ke peringkat memuktamadkan reka bentuk dan skop projek pada tahun 2018 dapat dilaksanakan kerana sehingga sekarang masih belum mendapat maklumat jelas berhubung pelaksanaan projek berkenaan.

14. PR-1521-L18622

**Dato' Dr. Ahmad Yunus bin Hairi [ Kuala Langat ]** minta **MENTERI KESIHATAN** menyatakan :

- (a) status perkhidmatan kesihatan Malaysia akan terus kukuh di masa hadapan setelah diuji dengan wabak pandemik COVID-19 yang lalu; dan
- (b) apakah perancangan Kementerian bagi memastikan aliran keluar tenaga pakar dari perkhidmatan kesihatan negara dapat dielakkan dan adakah fasiliti kesihatan di Malaysia sudah mampu membina vaksin sendiri.

15. PR-1521-L18559

**Tuan Riduan bin Rubin [ Tenom ]** minta **MENTERI BELIA DAN SUKAN** menyatakan :-

- (a) polisi terkini Kementerian untuk mengurangkan kadar pengangguran belia di negara kita; dan
- (b) langkah proaktif Kementerian untuk memperkasa taraf ekonomi para belia di kawasan luar bandar terutama di Sabah.

16. PR-1521-L19134

**Dato' Seri Dr. Shahidan bin Kasim [ Arau ]** minta **MENTERI PEMBANGUNAN KERAJAAN TEMPATAN** menyatakan apakah Kementerian bercadang untuk memperkenalkan inisiatif khas di luar Kuala Lumpur iaitu model '*Council Home*' atau Rumah Majlis yang diperkenalkan oleh Dewan Bandaraya Kuala Lumpur (DBKL) bagi membantu golongan yang tidak berkemampuan membeli kediaman pertama mereka.

17. PR-1521-L18278

**Datuk Seri Dr. Noraini Ahmad [ Parit Sulong ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan sejauh mana komitmen Kerajaan dalam usaha menangani cabaran perubahan iklim di Malaysia dan apakah bentuk kerjasama serantau yang akan dilaksanakan dalam visi mencapai sifar karbon sedunia.

18. PR-1521-L19332

**Dato' Haji Abdul Khalib bin Abdullah [ Rompin ]** minta **MENTERI BELIA DAN SUKAN** menyatakan adakah Kementerian mempunyai rancangan jangka panjang untuk melatih belia-belia dalam negara kita sama ada dalam aspek sukan atau aspek lain sebagai satu pendekatan ke arah mengukuhkan perpaduan di kalangan rakyat.

19. PR-1521-L18486  
**Puan Rodziah binti Ismail [ Ampang ]** minta **MENTERI KESIHATAN** menyatakan apakah perkhidmatan kesihatan awam sedia ada atau sedang dirancang yang menggalakkan rakyat mencegah penyakit dan/atau bersiap siaga menghadapi risiko penyakit pada kos berpatutan berbanding rawatan setelah ditimpa penyakit yang jauh lebih mahal, sekaligus membantu mengurangkan beban kewangan Kerajaan Persekutuan.
20. PR-1521-L18963  
**Tuan Muhammad Ismi bin Mat Taib [ Parit ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status usaha untuk menaiktarafkan semua rumah pam Pengairan Luar Jelapang di sepanjang Sungai Perak berikutan fungsinya dilihat kurang berkesan pada waktu ini disebabkan paras air Sungai Perak semakin rendah.
21. PR-1521-L18531  
**Datuk Suhaimi bin Nasir [ Libaran ]** minta **MENTERI BELIA DAN SUKAN** menyatakan apakah langkah strategik Kerajaan untuk belia diberi suntikan peluang pekerjaan bagi meningkatkan ekonomi dan mengurangkan masalah miskin tegar di Sabah kawasan Sandakan khususnya Libaran.
22. PR-1521-L18154  
**Dato Anyi Ngau [ Baram ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan rancangan dan projek-projek pihak Kementerian untuk menangani masalah-masalah banjir yang sering berlaku di kawasan Parlimen Baram sejak kebelakangan ini.
23. PR-1521-L17977  
**Tuan Chow Kon Yeow [ Batu Kawan ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan senarai projek dan lokasi/kawasan yang diberi kelulusan menukar guna kawasan hutan simpan di setiap negeri dari tahun 2018 sehingga 2022.
24. PR-1521-L18607  
**Tuan Prabakaran A/L M Parameswaran [ Batu ]** minta **MENTERI SUMBER MANUSIA** menyatakan berapa nilai peratusan pemain ekonomi gig terutama e-hailing dalam pasaran yang mencarum dengan Perlindungan SPS Pertubuhan Keselamatan Sosial (PERKESO) yang telah dikuatkuasakan pada 1 Jun 2022 sehingga Januari 2023 termasuk bagaimana cara perlaksanaan dan penguatkuasaan dari pihak Kementerian.

25. PR-1521-L18332

**Tuan Jimmy Puah Wee Tse [ Tebrau ]** minta **MENTERI DALAM NEGERI** menyatakan setakat 2022, daripada 54,000 permohonan kewarganegaraan Malaysia, ada hampir 36,000 lagi permohonan masih dipertimbangkan, ramai terdiri daripada kanak-kanak bawah 18 tahun, bagaimana Kerajaan boleh mempercepat permohonan-permohonan ini dengan kadar lebih pantas.

26. PR-1521-L19040

**Tuan Muhammad Fawwaz bin Mohamad Jan [ Permatang Pauh ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan hasil penilaian Laporan Penilaian Kesan Kepada Alam Sekeliling (EIA) projek Penang South Reclamation (PSR) serta nyatakan pendirian Kerajaan terhadap projek mega ini.

27. PR-1521-L19318

**Tuan Lee Chuan How [ Ipoh Timur ]** minta **MENTERI KESIHATAN** menyatakan apakah jumlah (bulanan) pesakit yang menunggu 48 jam atau lebih ketika di Jabatan Kecemasan dan Trauma untuk kemasukan ke wad di hospital-hospital di bawah Kementerian Kesihatan Malaysia, di antara Januari 2013 sehingga Disember 2022.

28. PR-1521-L18908

**Dato' Sri Tuan Ibrahim bin Tuan Man [ Kubang Kerian ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan langkah Kerajaan dalam memenuhi komitmen untuk mengurangkan intensiti pelepasan gas rumah hijau (GHG) sehingga 45 peratus kepada Keluaran Dalam Negara Kasar (KDNK) pada 2030.

29. PR-1521-L18242

**Tuan Haji Yusuf bin Abd. Wahab [ Tanjong Manis ]** minta **MENTERI KESIHATAN** menyatakan adakah perancangan untuk membaik pulih dan menambah fasiliti perubatan di klinik-klinik Tekajong, Buit, Betanak dan Paloh. Keadaan klinik-klinik sedia ada adalah agak usang serta serba kekurangan dan menyukarkan rakyat untuk menerima perkhidmatan kesihatan yang memuaskan.

30. PR-1521-L19101

**Datuk Iskandar Dzulkarnain bin Abdul Khalid [ Kuala Kangsar ]** minta **MENTERI SUMBER MANUSIA** menyatakan peranan dan usaha Kementerian dalam memastikan pengambilan dan pengurusan pekerja asing lebih efektif.

31. PR-1521-L18998  
**Datuk Andi Muhammad Suryady bin Bandy [ Kalabakan ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah status terkini pembinaan Empangan Cinta Mata di Jalan Gudang Empat, Tawau dan bilakah jangkaan ianya dapat beroperasi sepenuhnya bagi mengatasi masalah keperluan bekalan air penduduk setempat khususnya di Kalabakan.
32. PR-1521-L19281  
**Tuan Fathul Huzir bin Ayob [ Gerik ]** minta **MENTERI KESIHATAN** menyatakan apakah inisiatif pihak Kementerian untuk membela kebajikan dan kesihatan warga Hulu Perak amnya dengan mengambil kira fasiliti yang sudah berusia dan tidak relevan menampung pesakit kecemasan atau kritikal seperti mangsa kemalangan dan bersalin. Ini kerana Hospital Gerik sedia ada terpaksa menampung jumlah pesakit di daerah Hulu Perak dan mangsa kemalangan Lebu Raya Timur Barat, tentera, pihak penguat kuasa sempadan, pelancong dalam dan luar negara.
33. PR-1521-L18564  
**Tuan Haji Ahmad Johnie bin Zawawi [ Igan ]** minta **MENTERI DALAM NEGERI** menyatakan sejauh manakah perancangan pembinaan baru ibu pejabat (IPD) Matu - Daro di Parlimen Igan. Adakah ianya sudah dimasukkan di dalam *rolling plan* RMK-12.
34. PR-1521-L18786  
**Tuan Haji Mohd Hasnizan bin Harun [ Hulu Selangor ]** minta **MENTERI PENGANGKUTAN** menyatakan usaha Kementerian untuk menaik taraf kecekapan pengangkutan awam seperti komuter di pinggir bandar bagi mengurangkan kesesakan jalan raya di pusat bandar.
35. PR-1521-L18360  
**Dr. Mohammed Taufiq bin Johari [ Sungai Petani ]** minta **MENTERI DALAM NEGERI** menyatakan perkembangan terkini usaha mengesan Low Taek Jho, Terence Geh Choh Heng, Casey Tang Keng Chee, Jasmine Loo, Nik Faisal Ariff Kamil dan Eric Tan Kim Loong dalam kerangka supaya semua yang terlibat dalam skandal 1MDB ini dapat dibawa ke muka pengadilan.
36. PR-1521-L19377  
**Dato' Dr. Alias bin Razak [ Kuala Nerus ]** minta **MENTERI PEMBANGUNAN KERAJAAN TEMPATAN** menyatakan sama ada Kementerian mempunyai perancangan untuk mewujudkan semula pilihan raya pihak berkuasa tempatan (PBT) dan sehingga kini sejauh mana kajian ke arah itu telah dilaksanakan.



37. PR-1521-L18727

**Dr. Kelvin Yii Lee Wuen [ Bandar Kuching ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan tentang perkembangan Projek Pembangunan Lembangan Sungai Bersepadu (PLSB) Sungai Sarawak, jangka masa ia akan disiapkan dan sebab projek ini telah tertangguh dari jangka masa yang sepatutnya.

38. PR-1521-L18059

**Datuk Ir. Shahelmey bin Yahya [ Putatan ]** minta **MENTERI DALAM NEGERI** menyatakan perancangan Kementerian Dalam Negeri terhadap pembinaan dan status Balai Polis Putatan.

39. PR-1521-L18451

**Tuan Lo Su Fui [ Tawau ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan kebersediaan Kementerian untuk menyenaraikan fasa seterusnya bagi Projek Tebatan Banjir Sungai Tawau, Lembangan Sungai Tawau Fasa 1(a) dalam Rancangan Malaysia Ke-12 (RMK-12).

40. PR-1521-L18146

**Dato' Sri Richard Riot anak Jaem [ Serian ]** minta **MENTERI DALAM NEGERI** menyatakan langkah-langkah untuk memperketat keselamatan di sempadan Sarawak – Kalimantan, Indonesia. Apakah status terkini projek Pembinaan ICQS Tebedu.

41. PR-1521-L18635

**Puan Rodiyah binti Sapiee [ Batang Sadong ]** minta **MENTERI DALAM NEGERI** menyatakan apakah status tindakan Kementerian dalam menangani isu bangunan daif Ibu Pejabat Polis Daerah Simunjan serta Balai Polis Daerah Sadong Jaya di mana keadaan premis berkenaan adalah uzur dan tidak lagi sesuai untuk anggota yang bertugas.

42. PR-1521-L17962

**Datuk Jonathan Yasin [ Ranau ]** minta **MENTERI KEMAJUAN DESA DAN WILAYAH** menyatakan bilakah pembinaan naik taraf Jalan Kauluan - Pinausok akan dimulakan kerana sebelum ini Kerajaan telahpun memberikan '*ceiling*' peruntukan untuk membuat kerja-kerja awalan untuk tujuan lanjut bagi pembinaan jalan ini. Jalan ini di dalam keadaan yang daif dan merbahaya serta perlu ditangani segera.

43. PR-1521-L18408  
**Tuan Lee Chean Chung [ Petaling Jaya ]** minta **MENTERI DALAM NEGERI** menyatakan apakah Kerajaan akan melaksanakan penstrukturan semula kenaikan elaun tetap perumahan untuk anggota polis bagi mengatasi isu kadar sewaan rumah yang tinggi dihadapi oleh anggota polis yang menetap di bandar.
44. PR-1521-L18424  
**Tuan Wong Chen [ Subang ]** minta **MENTERI KESIHATAN** menyatakan kedudukan Kementerian untuk meneruskan projek pembangunan Klinik Kesihatan USJ 1 di Subang memandangkan projek tersebut telah diluluskan dan diusulkan di dalam Bajet 2023 oleh Kerajaan terdahulu.
45. PR-1521-L18661  
**Puan Hajah Salamiah binti Mohd Nor [ Temerloh ]** minta **MENTERI DALAM NEGERI** menyatakan statistik data kematian kanak-kanak kerana kes penderaan daripada tahun 2018 - 2023 mengikut pecahan negeri, tahun dan jantina dan berapa jumlah kes yang telah dibawa ke mahkamah dan diselesaikan.
46. PR-1521-L(5)00150  
**Dato' Ramanan Ramakrishnan [ Sungai Buloh ]** minta **MENTERI KESIHATAN** menyatakan apakah langkah persiapan dan pencegahan di masa hadapan oleh Kementerian dalam menghadapi risiko wabak seperti COVID-19.

[ Pertanyaan di bawah PM 22(5) ]

47. PR-1521-L18112  
**Dato' Wira Dr. Ku Abd Rahman bin Ku Ismail [ Kubang Pasu ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan sama ada Kerajaan berhasrat untuk membayar pampasan kepada Kerajaan Negeri Kedah berdasarkan kepada pengorbanannya dalam :
- (a) simpanan tanah hutan seluas 107,495 hektar sebagai tadahan air bagi memenuhi keperluan bekalan air kepada negeri-negeri Kedah, Pulau Pinang dan Perlis; dan
  - (b) tanah sawah padi seluas 107,472 hektar demi untuk jaminan bekalan beras negara.

48. PR-1521-L18831

**Datuk Seri Panglima Bung Moktar bin Radin [ Kinabatangan ]** minta **MENTERI PENGANGKUTAN** menyatakan apakah peranan dan usaha Kerajaan dalam mengawal dan seterusnya mengatasi masalah tambang penerbangan yang meningkat di musim perayaan terutamanya penerbangan dari Sabah ke Kuala Lumpur atau sebaliknya. Dipohon juga agar penerbangan Kota Kinabalu – Sandakan dapat ditambah kekerapannya.

49. PR-1521-L18733

**Dato' Muhammad Bakhtiar bin Wan Chik [ Balik Pulau ]** minta **MENTERI DALAM NEGERI** menyatakan dasar terkini dan pelan holistik Kementerian berkenaan program MM2H yang berpotensi memberi pulangan lumayan buat negara.

50. PR-1521-L18704

**Tuan Roy Angau anak Gingkoi [ Lubok Antu ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan perkembangan di bawah Pelan Hala Tuju Tenaga Boleh Baharu Malaysia 2022 - 2035 serta inisiatif Kementerian dalam menggalakkan penggunaan sumber tenaga boleh baharu seperti solar di kawasan luar bandar.

51. PR-1521-L18009

**Tuan Sanisvara Nethaji Rayer A/L Rajaji [ Jelutong ]** minta **MENTERI PENGANGKUTAN** menyatakan sama ada Kerajaan Perpaduan sekarang mempunyai komitmen untuk menghidupkan semula perkhidmatan feri ikonik yang tersadai di Pulau Pinang.

52. PR-1521-L18469

**Datuk Seri M. Saravanan [ Tapah ]** minta **MENTERI SUMBER MANUSIA** menyatakan apakah status kelulusan syarikat yang telah dilantik oleh Kementerian untuk menguruskan sistem *e-wages* pada tahun 2022 bagi memastikan setiap pekerja di negara ini termasuk warga asing dibayar gaji dan upah seperti yang dijanjikan majikan.

53. PR-1521-L18372

**Tuan Tan Hong Pin [ Bakri ]** minta **MENTERI PEMBANGUNAN KERAJAAN TEMPATAN** menyatakan keputusan atau pandangan Majlis Perancang Fizikal Negara tentang Projek Pembangunan Maharani Energy Gateway yang melibatkan penambakan tiga pulau buatan manusia seluas 1,295 hektar. Nyatakan tindakan yang diambil oleh Kerajaan untuk membantu nelayan dan menyelamatkan paya bakau yang akan terjejas.

54. PR-1521-L18216  
**Tuan Mohd Sany bin Hamzan [ Hulu Langat ]** minta **MENTERI SUMBER MANUSIA** menyatakan adakah Kementerian berhasrat membina lebih banyak pusat-pusat pendidikan teknik dan vokasional khusus untuk para pelajar OKU selepas mereka tamat di peringkat sekolah menengah.
55. PR-1521-L18664  
**Puan Yeo Bee Yin [ Puchong ]** minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan langkah-langkah Kementerian bagi mengurus e-waste domestik yang semakin meningkat dan apakah status terkini peraturan e-waste.
56. PR-1521-L19473  
**Datuk Matbali bin Musah [ Sipitang ]** minta **MENTERI KEMAJUAN DESA DAN WILAYAH** menyatakan mengenai status Projek Bekalan Air Luar Bandar untuk kawasan Parlimen Sipitang.
57. PR-1521-L19219  
**Tuan Wan Ahmad Fayhsal bin Wan Ahmad Kamal [ Machang ]** minta **MENTERI DALAM NEGERI** menyatakan apakah bentuk pemantauan yang dilakukan ke atas aktiviti perjudian dalam talian yang semakin parah dalam kalangan belia. Apakah langkah mitigasi yang sedang atau akan diambil oleh pihak Kementerian bagi membendung kejahatan ini.

**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

1. **Menteri Kewangan**

- \* Rang Undang-Undang Kewangan 2023.

2. **Menteri Kewangan**

- \* Rang Undang-Undang Levi Keuntungan Luar Biasa (Pengesahan) 2023.

---

\* Menandakan bahawa Rang Undang-undang ini akan dibawa pada semua peringkat di mesyuarat ini.

## ATURAN URUSAN MESYUARAT DAN USUL-USUL

1. Menyambung semula pertimbangan ke atas Rang Undang-undang Perbekalan 2023 (D.R.2/2023) dan Usul Anggaran Perbelanjaan Pembangunan 2023 seperti berikut :-

“Bahawa Dewan ini, menurut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa suatu jumlah wang sebanyak tidak lebih dari sembilan puluh sembilan bilion ringgit (RM99,000,000,000) dibelanjakan daripada Kumpulan Wang Pembangunan bagi tahun 2023, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2023, yang dibentangkan sebagai Kertas Perintah 19 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut, dan bahawa Usul yang telah diluluskan oleh Dewan ini pada 20 Disember 2022 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2023 adalah dibatalkan dan hendaklah disahkan.”

**Dalam Jawatankuasa Sebuah-buah Majlis ( 13 Mac 2023 )**

- |    |                |                                                              |                               |
|----|----------------|--------------------------------------------------------------|-------------------------------|
| 2. | ( D.R 1/2023 ) | Rang Undang-Undang Pencetakan Teks Al-Qur'an (Pindaan) 2023. | <b>Bacaan Kali Yang Kedua</b> |
|----|----------------|--------------------------------------------------------------|-------------------------------|

**[ Menteri Dalam Negeri ]**

3. **Menteri Kewangan** akan mencadangkan :-

“Bahawa Dewan ini, mengikut peruntukan perenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan) membuat pelaburan dengan menukar baki pinjaman Kerajaan Malaysia sebanyak RM165,282,814.00 kepada UDA Holding Berhad (UDA), sebuah syarikat dimiliki sepenuhnya oleh Menteri Kewangan (Diperbadankan) kepada ekuti (modal saham) bersamaan Seratus Enam Puluh Lima Juta Dua Ratus Lapan Puluh Dua Ribu Lapan Ratus Empat Belas (165,282,814) unit saham biasa pada nilai RM1 bagi satu unit saham.”

4. PR-1521-U(27)231

**Dato' Seri Dr. Shahidan bin Kasim [ Arau ] akan mencadangkan :**

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656km

namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

**[ Menteri Dalam Negeri ]**

5. PR-1521-U(27)232

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan makanan tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

**[ Menteri Pertanian dan Keterjaminan Makanan ]**

## 6. PR-1521-U(27)233

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

**[ Menteri Pembangunan Kerajaan Tempatan ]**

## 7. PR-1521-U(27)234

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

**[ Menteri Ekonomi ]**



## 8. PR-1521-U(27)235

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

**[ Menteri Pertanian dan Keterjaminan Makanan ]**

## 9. PR-1521-U(27)236

**Dato' Seri Dr. Shahidan bin Kasim [ Arau ]** akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

**[ Perdana Menteri ]**

10. PR-1521-U(27)237

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

**[ Perdana Menteri ]**

11. PR-1521-U(27)238

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

**[ Menteri Komunikasi dan Digital ]**

12. PR-1521-U(27)239

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

**[ Menteri Pendidikan ]**

13. PR-1521-U(27)240

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

**[ Menteri Pertanian dan Keterjaminan Makanan ]**

14. PR-1521-U(27)241

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

**[ Perdana Menteri ]**

15. PR-1521-U(27)242

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

**[ Menteri Pertanian dan Keterjaminan Makanan ]**

16. PR-1521-U(27)243

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

**[ Menteri Sumber Asli, Alam Sekitar dan Perubahan Iklim ]**

17. PR-1521-U(27)244

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

**[ Menteri Kewangan ]**

18. PR-1521-U(27)245

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan.

Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

**[ Menteri Dalam Negeri ]**

19. PR-1521-U(27)225

**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan didalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

**[ Perdana Menteri ]**

20. PR-1521-U(27)226

**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

**[ Menteri Pertanian dan Keterjaminan Makanan ]**

21. PR-1521-U(27)227

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

**[ Menteri Ekonomi ]**

22. PR-1521-U(27)228

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, bancia daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para nelayan dengan memberi alasan hasil yang berkurangan disebabkan

oleh cuaca buruk dan secara tidak langsung memberikan kesan negatif kepada rantaian sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada golongan-golongan yang tidak mahir menggunakan kemudahan internet dan agensi berkaitan haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu. "

**[ Menteri Pertanian dan Keterjaminan Makanan ]**

23. PR-1521-U(27)229

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcay sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.



Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

**[ Menteri Sumber Asli, Alam Sekitar dan Perubahan Iklim ]**

24. PR-1521-U(27)230

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

**[ Menteri Perpaduan Negara ]**

**RISALAT-RISALAT YANG DIBAWA KE DALAM MESYUARAT**  
**(DEWAN RAKYAT)**

| <b><u>TAHUN</u></b><br><b><u>2023</u></b> | <b><u>RISALAT/DOKUMEN</u></b>                                                                   | <b><u>TARIKH</u></b><br><b><u>DIBENTANGKAN</u></b> |
|-------------------------------------------|-------------------------------------------------------------------------------------------------|----------------------------------------------------|
| ST. 46                                    | Laporan Tahunan dan Penyata Kewangan Yayasan Tunku Abdul Rahman Bagi Tahun 2021 (Telah Diaudit) | 14 Mac 2023                                        |

**\*\*UCAPAN-UCAPAN**  
**( PERATURAN MESYUARAT 17 )**  
**( KAMAR KHAS )**

| <b>Tarikh Ucapan</b>      | <b>Ahli Yang Berucap</b>                                   | <b>Tajuk Ucapan</b>                                                                                | <b>Menteri Yang Bertanggungjawab</b>                        |
|---------------------------|------------------------------------------------------------|----------------------------------------------------------------------------------------------------|-------------------------------------------------------------|
| 1. 14.03.2023<br>(Selasa) | 1. YB Dr. Kelvin Yii Lee Wuen<br>(Bandar Kuching)          | 1. Status Pelaksanaan Projek Pembangunan Lembangan Sungai Bersepadu (PLSB) Sungai Sarawak          | 1. YB Menteri Sumber Asli, Alam Sekitar dan Perubahan Iklim |
| 2. 14.03.2023<br>(Selasa) | 2. YB Dr. Kelvin Yii Lee Wuen<br>(Bandar Kuching)          | 2. Status Pelaksanaan Perjanjian <i>Stage Bus Services Transformation</i> (SBST) di Bandar Kuching | 2. YB Menteri Pengangkutan                                  |
| 3. 14.03.2023<br>(Selasa) | 3. YB Tuan Afnan Hamimi bin Taib Azamuddin<br>(Alor Setar) | 3. Isu Larangan Penggunaan Kenderaan Mikromobiliti                                                 | 3. YB Menteri Pengangkutan                                  |
| 4. 14.03.2023<br>(Selasa) | 4. YB Tuan Afnan Hamimi bin Taib Azamuddin<br>(Alor Setar) | 4. Isu Tanah Pertanian di Bandaraya Alor Setar                                                     | 4. YB Menteri Pertanian dan Keterjaminan Makanan            |

**\*\* Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**